



毬子情

寮日在公園坐寮，堵著社區肚个兩個細人在公園踢毬子，做阿姊个風神嘍嘍踢分老弟看，一下單腳踢、一下雙腳離地踢，一下對頭前踢、一下對後背踢，表演各種花式个踢法，老弟儕看去嘴開開，緊喬阿姊教佢。該阿姊也當有耐心陪老弟踢，兩儕共下踢毬子，一下踢高高、一下踢低低、一半下也會無接著，左腳踢毋著、換正腳踢，兩姊妹搞去暢壞俵，笑去屹屹滾。

看著細人踢毬子，分佢想起頭擺阿奶用雞毛做雞毛球分佢个情景；阿奶手當巧，佢使得同當普通个東西變做生趣个玩具；阿奶曉用細竹筴做嘍嘍銃，銃子使得用肥料草个花蕾、也使得用搵水个衛生紙團，一下出力尖出去，使得射當遠，吾等盡好比賽看麼人射盡遠；有个人較番綻，會拿嘍嘍銃來射人，搥去大家吱吱滾，這下恁起來實在已心色。阿奶也會拗芒花來做雞公、用菅草葉摺草蜢、破竹篾來做紙鷗，厥个手像會變奇術个樣，你想得著个，佢做下使得變分你。

有一擺，阿珍帶一個彩色个雞毛球來學校，講係厥爸出張買轉來分佢个，大家試著已稀罕，圍緊佢想借來看，毋過阿珍當醫察，規定吾等單淨使得看、使毋得摸。該日放學轉，佢同阿奶講起，阿奶笑笑講：「毋怕啦，有得堵好，正喊若爸買分你。」第二日轉到屋家，一個新衝衝个雞毛球斯放在書桌面，花色个布包核銀角，同雞毛相連个所在，用線纏纏，雖然羽毛毋係彩色个，毋過該榮榮、長長、烏金、烏金个羽毛，也當靚、當錫人。佢問阿奶，阿奶共樣笑咪咪講：「係啦！係佢做个啦！你有中意無？」佢無多想，該恁靚个雞毛係哪位來个？斯拿核雞毛球走去禾埕踢，該雞毛球做來當素絲，逐到踢著斯飛高高、跌落來个時也正正正，長長个雞毛穩穩企核，正經當好看。

食夜个時節，飯桌頂有一盤炒雞肉，咦？閒時間節仰會有雞肉好食呢？阿奶夾一枝雞髀放在吾碗肚，佢微微笑，目珠彎彎像月光恁溫柔看核佢講：「戇孫啊！若雞毛球斯係這雞个羽毛做个啦！」阿奶講：「你看你，同阿奶討愛雞毛球，阿奶連愛畜分若叔姆做月个雞公都剷撇咧！」阿奶緊攏吾頭那講：「毋怕，雞過畜斯有咧！」

阿奶當惜佢，該擺過後，恁久恁久阿奶斯會做一個雞毛球分佢，剷雞个時收集雞靚靚个羽毛，變做阿奶个習慣。現下个細人，有當多各式各樣个新奇玩具，毋過，在吾心肝肚，該阿奶親手做分佢，使得踢高高、跌落來又還會企正正个雞毛球，正係一等一盡素絲个玩具。

作者：徐姿華

☆詞彙學習☆

【毬子】gien` zii`：毬子。

【暢壞俵】tiong` fai` lai`：非常高興。

【肥料草】pui` liau` co`：銀合歡。

【雞毛球】gie+ mo+ kiu`：毬子。

【心色】sim+ sed`：有趣。

【出張】cud` zhong+：出差。